



國家清史編纂委員會・文獻叢刊

清代詩文集彙編

國家清史編纂委員會・文獻叢刊

清代詩文集彙編

《清代詩文集彙編》編纂委員會 編

上海古籍出版社

清代詩文集彙編 五三三

聽松廬詩鈔十六卷松心詩集二十九卷（缺燕臺三集燕臺五集）松心詩錄十卷

附二編一卷松心文鈔十卷松心雜詠不分卷聽松廬駢體文鈔四卷 張維屏 撰

思詒堂詩稟十二卷思詒堂文稟一卷 金衍宗 撰

五五三

粵東三子詩序

昔朱竹垞論粵東詩派惟蘭汀小變而歐楨伯黎瑤石區海目皆仍南園五先生之遺音此蓋爲有明一代前後七子遞變而爲公安竟陵發也予之論粵東詩則不然我

國朝經學考訂之精什倍於前明詩文之盛亦倍之居今日而言風雅通途豈得執屈梁陳三家以區流派乎予昔於藥洲草堂與諸賢論詩大旨以杜爲宗而所得士如馮魚山張葯房輩亦皆不專以三家自限也厥後葯房歸里已刻其詩而魚山猶未有專集近日其門弟子輩始爲抄撮刻之究之非其心也然而涉河海者必溯諸崑崙發源之處當魚山嚮學之初予與陸耳山李南澗擊節推賞於羊城又與錢穉石把卷欣歎於都門

聽松廬詩鈔卷首

皆魚山早歲詩也今又三十餘年而吾門陳荔峯於粵得張南山黃香石二詩人又因南山得見譚康侯之作三子詩各有所就粵中將刊此三集而問序於予予方日與南山論詩又得見香石詩話持論皆正惡可無一言所最吾學侶宜博精經史而後其詩大醇詩必精研杜韓蘇黃以厚根柢而後其詞不囿於一偏此則於士習人心皆重有賴焉豈僅不執三家流派而已也嘉慶十六年辛未閏三月望後二日北平翁方綱

人有性情詩於是作志發爲言聲通於樂波瀾須才根柢在學肆必先醇苦乃得樂作者牛毛成者麟角僕非日能寸心是託得失自知疾病自藥後有桓譚安能豫度番禺張維屏

聽松廬詩鈔卷首

二

聽松廬詩鈔卷一

番禺 張維屏

玉麟

白雲

白雲環北郭鐘梵晝沉沉海國蛟龍氣仙山鸞鶴音泉飛丹竈
冷苔積石壇深欲覓安期棗巖棲生道心

園居卽事

幽窗風竹喧破夢起我早海霞媚朝曦飛光散林表露泣苔髮
明石壓松骨矯水廊綠陰淨蘿磴孤煙裊隔花聞戲魚倚樹翫
飛鳥目澄清機發慮澹畏途少客來撥舊醅新筍可一飽

寒食感賦

鄉國山陰道風花寒食天提壺人出郭上塚客停船大母頭如

聽松廬詩鈔卷一

雪深談淚湧泉椒漿何處奠飛夢路三千祖墓在山陰

秋日同漆丈雲窩

修綸 邱曙巖 吳石磴 格 馮椅 邨 德鈞

陳對堦

廷揚 集潘伯臨 正亨 南墅

菰蘆搖曳水天寬一片秋陰釀早寒難得故人隨雨集便攜新
句對花看香匳未可輕囑僮絲竹何曾累謝安磨鏡織簾從所
好釣鰲還欲把虹竿

懷吳象川先生

政達

番禺一都會宰官吳隱之鳴琴獲清暇結習耽文辭賤子方卬
角操觚等邀嬉試士千餘人公曰此子奇肅然罷官去執手珠
海湄勗我勤濯漑養此千霄姿別來四五載齒髮恐就衰豈無
雙鯉魚浮沉安得知都勻旣齋漆獨山復崔巍徬徨夢不達再

見當何時感公期許意耿耿絨心脾

仇英十八羅漢圖

一丸在手光熊熊鱗而蚴蟉來飛龍一坐磐石凝雙瞳一拱而
立夜叉侍頂上古鼎烟冥濛高者持珠據怪松下者昂首相
從老者拂塵眉青茸少者有若還珠童睡其腹者容體豐得大
解脫披心胸瘦者欲出羞龍鍾卻立山背扶孤筇咫尺魔魔驚
山風波羅敦固毛髮鬚祖右臂者顏酒紅寶手欲下膽氣雄離
立者二參以一指揮獅象如奴僮虬鬚者獨伸食指指上白氣
長如虹琉璃素雲盤太空一合掌拜方鞠躬上有石壁高巖從
下有澗水流淙淙或撲鉢坐清溪東或洗足向寒流中懸崖陡
絕見一老三心寂滅如癡聾一十八尊狀不同法門不二筆

聽松廬詩鈔卷一

二

通披圖光怪驅塵蒙花雨欲落聞疎鐘

與仲弟

維翰 夜話追憶李弟 維樹 泣然有作

卯角團圞笑語真尋思往事幻微塵可憐瓦屋同聽雨大被今
宵只兩人

春夜紫藤池館識集

東風萬物憐憐送暖入瓊筵白月藤花下春人楊柳邊寄愁歸碧
海得句問瑤天誰道蓬山遠雲屏六曲前

春寒曲

句芒小女嬌噴動東風刻地宵寒重流蘇寶帳裏巫雲銀屏十
二湘天凍博山甲煎香蠶綿丁竿壓水凝青烟鳳衾偎賴茜痕
膩蘭膏髮滑飛金蟬只虛一瓊餘酣失鈎簾卻放鑪香出問訊

細桃掃絳霞眉心一點梅酸入瑤窗了烏澀不開靈如泛海何時回夢持并剪裂寒玉紫霄推出頑輪來朝曦髮髻烘欄藥棠舟那畏蘋波惡手面青李約同心漁蓑鬪草嬉春樂

遺恨四首

方壺昨夜起罡風誰信瓊華一瞬空斑竹淚枯來渴鳳碧蘆聲斷失驚鴻梢頭荳蔻春猶淺臉際芙蓉酒正中莫唱黃雞催白日樽前癡夢尙朦朧

西母驂鸞入絳烟曉風環珮散羣仙卷施拔去心難死烏鵲飛來恨莫填玉鏡有臺安寶魄金丹無術駐華年紫藤花裏娟娟月會照娉婷小閣前

依舊星辰恰舊遊紅牆銀漢望悠悠冰輪蝕破蟾蜍泣玉杵春

聽松廬詩鈔卷一

三

殘蜥蜴愁錦里看花偏隔霧茂陵問雨易傷秋香泥千尺埋雲子腸斷金魚鎖畫樓

水邊樓閣黯輕陰佇苦停辛思不禁小雨似烟寒悄悄遠天如夢晝沉沉月中楊柳會舒眼風裏芭蕉未展心莫向蓮塘重倚攲紅衣狼藉冷珍禽

天上謠

琉璃宮殿霞旌入五色橋邊眾仙立卻從紫府見蘭香淚灑紅冰藕衫濕鴻龍玉狗羅天閣下祝應海波渾渾銀瓶貯得碧霄露滿酌爲君除渴煩琅函授我長生訣蹉跎不是無仙骨願駕鸞輪戲海山怕持玉斧脩蟾窟

龍王嫁女詞

叢祠夜半老狐語今夕龍王嫁女洞庭萬頃湖風寒大魚吹波瘦蛟舞琉璃城畔黃金臺蓮花紅旌開河伯健兒競奔走池州長史紛徘徊五色巨龜豎尾籠銅鼓響八百里西來素簡東隱娥鱗車過處微瀾紫小姑環珮翩驚鴻嬌啼淚滴桃花紅香淚隨風灑斑竹日出湘江烟霧綠

自題空山雲卧圖

太虛有元精萬物盡渣滓我醉眠大石飛濤洗兩耳海風吹夢去飄飄度弱水天門放日輪散作半天紫舉手攀扶桑雲氣出袖裏

短歌行

魑魅嘯林荆榛蔽途豈不憚險家無斗儲老驥雖健不如鹿駒

聽松廬詩鈔卷一

四

耕農雖勤不如博徒彼達斯智匪窮爾愚云誰與言短歌烏烏傷歌行

山木森森山雲陰陰古無人踪惟有烏音飛雲九天落木四野我思窮交淚下如瀉

善哉行

北風蕭蕭曜靈其奔臨觴不御短衣出門狡兔多心蒼鷹戴角射工伺影猛虎食肉黃雀啄粟不見網羅炤炤一火撲撲羣蛾我欲賣藥不如賣漿爾能屠狗不如牧羊麒麟在野魯人棄之真龍在庭葉公避之昔日青蛾今日皓首步兵大哭市兒掩口身騎赤豹言訪赤松九點青烟一氣濛濛

巫山高

巫山高蒼蒼湘水深茫茫綠萍在石紅豆在囊碧天清露
北雁南翔日暮風多吹我羅裳羅裳吹不開所思期不來

將進酒

將進酒開華堂炊金饌玉盃盤光鸞絃鳳管東西廂一樽未盡
白日落主人停杯忽不樂主人請勿憂賤子作歌能洗愁君不
見堯舜千鍾孔百觚飲者賢聖不飲愚後園吏舍相歌呼歐吐
竟汗丞相車吏部醉時墮酒囊鄭公死願爲酒壺我愛劉元石
曹騰美醉一千日我愛白子高羣仙招手同道遙聽我歌酌君
酒世事浮雲變蒼狗翹生不來莫開口何用移封向酒泉但願
一杯常在手噫噫吁項王夜半飲帳中漢王席上歌大風悲歡
雖異一醉同

聽松廬詩鈔卷一

五

俠客行

貴人赫赫權如山門前鷹犬十百一日不得閒解高堂華屋大
酒肥肉粉白黛綠哀絲豪竹貴人不足解貴人不足鷹犬僕僕
天陰鬼哭解鬼哭聲啾啾怪樹啼鵲鵲客從何方來下馬直上
酒家樓解寒風如刀雪如水酒家樓頭劍光起明日喧傳貴人
死解

并州兒

生小并州住呼鷹出古原自言吾有母不敢受人恩

野鷹來

野鷹來林鶴哀骨肉狼藉紛蒼蒼彎弓射鷹不可得樹高林密
烟霧黑鷹方得志鶴何辜鶴亦銜魚歸哺雛君不見雞啄蟲蟻

終被縛螳螂背後有黃雀

羊矢坑

羊矢坑邊豺虎窟驚飈捲樹日光沒樹頭老烏啼啞啞飛下草
間啄人骨烟火蕭條三五村富者移家貧閉門黃昏賊呼斬扉
入掠取財物搜雞豚閨中婦女色如土欲避倉皇無處所老姑
頓足兒抱頭氣結眼枯不得語賊怒縛人如縛鼠骨肉割絕廬
舍焚哭聲啾啾村外聞天陰路黑兒走失剪鬚燒紙招兒魂兒
不歸來兒死矣豈知虜作他人子他人子賣富室貴賤不同兒
則一慎勿鞭笞與瞋叱君不見親兒終日不離膝飯飽嬌啼索
梨栗

有感四首

聽松廬詩鈔卷一

六

白帝旌旗肅黃龍洞穴高斗壇宵縱火雪瀑晝磨刀攘攘尋凶
器蚩蚩憫爾曹親朋阻兵甲江湖首頻搔
慷慨循州守伊墨卿太守飛書數請兵早將螳臂斷何至豹胎成小
醜能無懼元戎說好生繞朝謀不用蒼赤涕縱橫
四百奇峯裏雲梯路阻艱鬼燐丹竈碧人血鐵橋斑剿撫需良
策瘡痍覓大還靈符書竹葉未易伏豺獍

啞虎腥風外哀鴻毒霧邊呼聲動猿鶴殺氣到神仙兵貴前茅
速山原左股還蓬萊飛海水亟爲洗戈鋌

十二月十九日東坡先生生日伊墨卿太守秉綬招同宋

芷灣太史相陰青原上舍東林家賢仲思齊陳仲卿卿

兩秀才設祀寒玉齋

梅檀一瓣烟宵深南飛曲奏生春風公之精神塞宇宙千秋四海爲公壽南方九死何栖栖命官磨竭符昌黎先生睡美忘還讀飯飽詩篇和彭澤柑朱橘綠真一清六百餘載通精誠座中髣髴見笠屐天際縹緲開瓶笙太守無官心似水水中得硯大歡喜豐湖香火今不孤宦海風波古如此義喟萬仞青美葉枕椰一卷非故廬雪泥鴻爪等寄耳瓊樓玉宇公歸乎天風浩浩靈旗趨何時黃坭坂下舟一葉赤壁磯頭酒百壺更聽笛聲穿雲裂石凌清虛

感懷

涼颼歛夕烟素月光在林美人眷清夜開軒彈玉琴掩抑未終曲徘徊攪憂襟眾耳習凡響此曲誰知音仰視孤鴻翔耿耿方橫參牛女永相望河漢廣且深亦有同心人離居傷滯淫容輝不可接悠悠千里心

聽松廬詩鈔卷一

七

讀書二首

讀書何所求將以通事理奈何教兒童誘以博青紫少年慕富貴努力鑽故紙想其佔畢時意已不在此聖賢千萬言割裂等統綺一朝得志去譬若假道衛遠大難預期初念要勿鄙造士先養蒙請自小學始

六經闢大義赤日行天中諸子如眾星經緯各有宮羅列廿二史治亂爲一叢後人矜獨得前人所勿通後人苦艱難前人所從容故紙愁汗牛新機競雕蟲文章不適用梨棗災何窮一火灰百家君勿尤祖龍

甘泉宮瓦歌

甘泉山光壓清渭漢宮不改秦宮地明庭一進方士言雲陽遂有神仙氣棠梨鵲相鮮新當時櫛櫛排魚鱗昆明水洗淨匹練咸陽泥擣飛輕塵胡桃油香露華鑲主角磨善雕削千尋下蔭九莖芝萬片高承五采雀虹檉照耀通天臺竹宮夜半神光來長生未央善頌禱茂陵秋雨多荒苔楊雄賦與王褒頌千秋文物同珍重漢庭已見單于朝唐室還觀鐵勒貢摩挲盛以古錦囊劫灰且莫悲阿房曹家銅雀今何處一樣秋風瓦礫場

秋懷

千林木落動霜鐘雲淨天高一盪胸晚徑日斜明橘柚澄江水遠靜魚龍風烟萬里愁征客寒暑三時閱老農慙愧腐儒謀食拙杜門羸羸養疎慵

聽松廬詩鈔卷一

八

莽莽荆襄厭甲兵忍看魍魎困蒼生風呼陰嶂蠻苗出月照荒城妖鳥鳴娘子軍容誇左道丈人師律重先聲讀書殺賊男兒事莫讓終童獨請纓

銀河西注洗妖氛墮地機槍夜半聞蜀道飛艘勞轉餉朔方驍騎勇從軍鶴鷺陳合屯江霧蛇虎旗開掃棧雲間道 賜糧歡萬姓彤弓先已 錫殊勳

百二秦關古戰場如毛羣盜敢披猖寶雞刷羽聲先震銅馬驚心肯欲僂諸將果能遵 廟算三軍漸喜卸戎裝願消兵氣穠民氣早買耕牛學種桑
頻年瘴海樹戈鋌吹角鳴鉦潦霧邊風裏刀腥龍戶竄潮頭

黑虎門懸已看徵側爲窮寇誰道孫恩作水仙滾滾驚濤休恃險將軍天上下樓船

辛苦人來蛟鱷叢江村守望百家同鼓鼙聲亂春潮裏刀戟光分夜火中所患是兵還似盜但求無罪忍論功羣黎頌禱渠魁怖鬚鬢蕭蕭老總戎

黃總戎標

鼉沫蛟涎浪作堆沙蟲猿鶴費驚猜蠻帆賊已乘風去犀甲軍如捉月來小醜無知終惜命重臣有守亦需才陽和本是蒼穹意一破頑陰要震雷

揚雄賦就漫吹噓廿載侯門跡本疎祇合短衣看射虎豈宜長缺嘆無魚中宵偶讀班超傳上略誰陳黃石書畢竟少游言可念且騎欵段守鄉閭

大洲火

聽松廬詩鈔卷一

九

大洲火鹽艚燒海賊如虎羣咆哮鹽艚已據索錢贖無錢難贖徒哀號巨艚堅固供賊用其餘一炬成枯焦三庚之際蒸炎燄火雲四舉如山高猛烈烟焰騰空霄祝融赫怒火勢驕直欲煮海煎狂濤垂頭大魚泣瘦蛟海童河伯紛驚騷有如赤壁方戰廖八十萬衆聲嘈嘈是時居人爭遁逃富者買舟得先濟窮民走險藏山坳風停火止賊稍散但聞怪木啼鴉鳴伏波將軍在何許願沈餘燼安吾土慎勿多言官長怒昨日出城聞劫渡

黃總戎行

萬口爭傳黃總戎廣東老將今黃忠總戎習水識水性夜半伏水如蛟龍賊船峩峩壓艚船總戎出海賊已空羣賊畏之如天

神衆軍親之如家翁蒼顏獨立心忡忡將星墮地來悲風盡瘁死當爲鬼雄盡驅蛟鱷朝祝融 國家優渥賞有功偏裨授以專閫崇虎頭猿臂二石弓纓冠翎翠珊瑚紅纓冠翎翠珊瑚紅嗚呼安得再見黃總戎

新造墟

出城路人喧聽者或變色昨日新造墟破曉海賊入鄉人早料此各自備矛戟相持成一團倉猝勢不敵婦女遭生虜火焰尤慘烈有客揮短刀殺賊計六七賊怒齊奮呼長鎗洞客腋民心本非怯賊實恃死力豺狼誠披猖得飽願少息兵來賊已去藥緩病乃急羊城太平久老不識兵革風聞心搖搖富者謀徙宅我家插架書手自點朱墨重之等兼金此寶賊豈識堂堂大吏

聽松廬詩鈔卷一

十

在日夕急籌畫芻蕘策誰陳蒼赤憂未釋紀實爲此詩空言究何益

金藝圃駕部善義有詩兄懷次韻奉報

喜聞秦蜀靖烽烟不信蛟鯨吼海天張弛士多投筆志蕭閒天富著書年蓬蒿未礙開三徑簞笠還思受一廛君自拏雲吾漱石綠陰如水抱琴眠

登樓

西北有高樓樓前杜若洲美人如斷雁往事問牽牛璧月隨風去銀雲學水流明河原不遠只在柳梢頭

紫藤曲二首

紫藤幕徑香雲裊花枝泣露金鈴小嬌魂不定蝴蝶愁玉枕微

劫失春曉珠帷貼地蘭堂深蠟眼細字繡來禽雲機盤盤折鴻
翼鐵網破碎珊瑚沉阿母由來愛方朔碧桃花下流霞酌胡麻
未熟丹竈寒麻姑餐上霜華落

枯槎觸石銀河乾白鳳病渴青鸞翻何時懶龍吸海水絳津宛
轉通微瀾匏瓜欲墜罡風起雲軒斷送嬋娟子觀香小妹怯宵
寒玉樓十二秋如水脩蛾不展枕手眠夢墮舊時亭院邊暗塵
漠漠紫藤化作冷猿啼暮烟

感舊

安排筆硯與笙簫檢點春衣理翠翹底事夜闌渾不寐百花生
日是明朝

倚風撲蝶試身輕翡翠裙邊夕照明繡得鳳頭鞵子好草痕多

聽松廬詩鈔卷一

上

處踏新晴

聰明不願號鍼神書仿簪花韻逼真兩字和南珍重寫自云初

學衛夫人

夜合花開試晚妝生來不識九迴腸商量欲乞天孫錦繡罷驚

鴛繡鳳凰

暮蟬不語抱疎桐寥濶雲天少過鴻涼月一棚星數點荳花風

裏聽秋蟲

新詩淘洗水般清呵凍書成別署名縱被天風吹得去不妨呼

作許飛瓊

卯角韶光月一弦衆香叢裏小遊仙塵根不染天花散我佳人

間已廿年

獨坐

屋外青山可療飢望中眉黛費相思縱無清露蟬終潔果有名
花蝶易癡肝膽祇宜明月照性情先被古人知亂書堆裏成枯
坐坐到鐘殘燭跋時

落葉三首

秋氣慘不樂千林方怒號詩人歌蟋蟀名士讀離騷風裏孤砧
急霜前畫角高乾坤莽空濶百感屬吾曹

獨夜哀蟬唱寥天斷雁過忽驚山骨削漸覺月光多颯颯催征
騎蕭蕭隨逝波洞庭秋思濶不爲弔湘娥

老衲倦掃地幽人驚叩門有時兼雨點無處著烟痕短夢何曾
穩羈懷不可論支撐憑鐵幹生意在孤根

聽松廬詩鈔卷一

上

秋夜懷徐丈薌圃

泠泠竹下泉疎疎花上星欹枕聽秋雨開門知夜晴解帶步前
除暗聞松桂馨徑濕啼露蛩衣輕墮風縈素交曠良觀欲往無
脩翎古愁積肺肝尺素何由明迴颺入羣木散作幽琴聲

馮比部魚山先生

徵昌招飲越秀講院席上賦呈二首

坐向春風裏都忘秋氣深登龍多士志門先生隨拙稿相馬古

人心有空君之語湛湛天中月冥冥海上琴十年繞清夢一夕

豁塵襟

蓬島神仙侶蒿廬孝子身白雲違畫省青史待詩人五嶽蟠胸

峻千篇出語真南園壇坫在好爲闢荆榛

伯臨在都中以九家注杜詩見寄率成一絕

君知我好浣花詩手自封題遠寄之開卷思君轉惆悵蕭蕭梧
葉雨來時

西園

西園半畝地溪水到窗前踈樹意中畫孤雲心外禪香燈僅佞
佛晴雨客談天我欲題新句高吟有暮蟬

閒居雜詩

八轡車本男兒事一品衣仍處士身辟穀封侯重善病種桑丞
相不憂貧事關諷諭言匡世興到飛騰筆有神勳業看人光竹
帛嘯歌容我出風塵

餓夫不受嗟來食志士甯食暮夜金辛苦持籌堪捧腹蒼黃投
關枉薰心但畱玉在何愁璞莫待桐焦始辨琴二十六年彈指
過海鷗同夢水雲深

聽松廬詩鈔卷一

三

二曜升沉歲序更九原多少古人行情長未有如天地命在何
須問死生造化心思偏宛轉鬼神面目本分明士龍大笑唐衢
哭哀樂由來不易平

貝葉蓮花妙孰傳黃芽白雪壽誰延僧雖入定難言佛人若無
求不羨仙肯信桃源真有地空聞兜率是生天亦仙亦佛從吾
好醉卽高歌倦卽眠

鄭貫亭侍御

士超枉過談空薄暮賦此奉贈卽送歸陽山

池館雨濛濛深返照紅蒼生事御史古人風抱策芻蕘
拙論心竹柏同天清見鷹隼莫類冥鴻

人日同胡蔚巖

翁文汪攜金鍾山青英醴香青芽

裳繡登粵秀山飯融公房

山靈有意助登臨閣住春寒一段陰小雨未成人日暖上方重
到佛緣深飽看雲樹開生面纔聽鐘魚悔壯心肉食勞勞君悟
否果然蔬筍味堪尋

上元後三日同金茂園

青藜胡蔚巖汪攜中買舟過馮子

泉妹婿

屏屬森竹園

春在山顛又水涯一枝柔艣劃連漪暖風吹我意常醉村路引
人行不疲雞犬聲從深樹認田園味讓老農知菜花香處柴門
掩寫出儲王畫裏詩

荔峯師命題紅燭校書圖

聽松廬詩鈔卷一

古

雨袪塵蒙太邱夫子真人傑耿耿元精卓天骨一曲霓裳冠衆
仙兩番冰鑑懸南粵玉堂清美被絲綸蚪篆龍韜校勘新草就
牋麻沾蠟液照來法酒爛星辰退直蕭閒親筆硯添香侍女宵
忘倦鴉鬢嬌雲頰影低墨花飛上釵梁燕絳紗偶坐聽談經讀
畫彭宣感易生詎望燃藜勞太乙尙思穿壁學匡衡光風吹暖
扶桑樹炎州桃李開無數潘錦江花妙剪裁手握鑑鍾眼如炬
百尺元龍氣自豪台階象緯炳青霄定知領取雙條日八柱承
天玉燭調

漫興

茫茫人海孰窮源納納乾坤此閉門胸有古歡書在手眼無機
事鳥忘言巖高合置松千尺天濶何妨月一痕興發便思尋鐵

脚祝融峯頂看朝曦

落花詩畫卷爲家顯斯秀才廷臣題

春風吹花花滿枝裁紅剪綺乘芳時治遊南國人何早駐駕東
君日正遲遲日唐唐春景麗九十風光流水逝開處須防落處
愁盛時好爲衰時計勾芒小女易含顰百丈遊絲不繫身一朝
機杼方停手滿目穠華盡塵花開花落長如此春去春來聊
復爾若把春花比作人春花爭及春人美若把春人比作花桃
李容顏安足恃蜂蝶去匆匆簾垂細雨中沈郎腰帶減杜老酒
樽空此時走馬長安道蹴踏殘紅損懷抱此時高閣剩斜陽客
去春歸空斷腸試問傷春誰刻意張緒風流還解事班管能攄
騷客懷錦囊偏貯佳人淚我亦蓬蒿一徑深感時聊發短長吟

《聽松廬詩鈔卷一》

圭

風花過眼原無定自抱青松一片心

聽松廬詩鈔卷之二

番禺 張維屏 子樹

古意

春水蕩朝霞春城處處花花香吹不散飛入暮愁家小閣芙蓉
障長亭玳瑁車傷離休望遠芳草遍天涯

胥江

遠山似入夢孤雲如出囊空江雨乍停冥冥一帆重

雨泊波羅坑

旅食路方永獨眠寒易侵春江流客夢夜雨滴鄉心烟濕帆移
墨村荒藥抵金灘迴風益怒未礙裏頭吟

睡熟過惶恐灘

《聽松廬詩鈔卷二》

夢到家園笑一回醒時睡眼尙驚猜舟人遙指萬安塔不覺身
從惶恐來

滕王閣

高閣俯長川斜陽此泊船水天終古在詞賦幾人傳都督亦知
己江風原偶然我來成獨立鄉思落霞邊

驛南舖曉發遇雨

昨日出店天未明今日出店方五更星沉月墮四野黑行客不
語驟不鳴但聞車前車後羣騾項下之銅鈴驟不住行鈴不住
聲東東丁丁鏗鏗錚錚初疑古戰場隱隱交戈兵又如走檐馬
颯颯秋風生模糊鄉夢心屢驚此際遊子難爲情猛然急雨來
縱橫雨勢漸重鈴聲輕欲去且住愁屏營茅店荒寒夢難續一

豆壁燈向人綠未聽何噉唱渭城似聞蜀道淋鈴曲

廬山

雨餘流水急潺潺破曉人行濕翠間洗出青蒼真面目馬前一笑見廬山

東林寺

東林曉停車芒屨踏蘚石山門何蕭條佛殿慘陰黑來尋古龍泉井餐土花赤銅塔供摩挲七級字半蝕鐘魚寂不聞寺僧出乞食土人述盛衰眼中幾更易我思遠公初闢地具慧力風流白蓮社置酒待彭澤昔賢去有年名山黯無色似聞笑語聲縹緲在空碧日冷松風號荒徑有虎跡

舟中望廬山作歌

聽松廬詩鈔卷二

二

我從廬山來衣裳尚有廬山之雲烟九江城外波連天挂席卻登江上船此時酒渴更思酒欲吸西江入吾口九派茫茫不可迴五老雲中忽招手何時天河水飛下廬山頭白虹倒挂三百丈跳珠濺玉千載無時休紫霄峯上科斗字云是夏禹治水泊船之所留我思匡君兄弟七人結廬盡據此山勝其樂真足輕王侯秦王漢武到此卻復去更從何處尋丹邱卽如陶公謝公太白及坡老不過往來登眺成勝遊香山草堂雖云樂一出已爲琵琶愁古人如水流青山向空立層嵐吹盡江天高捧出芙蓉千朵濕昨行廬山陰今見廬山陽香爐雙劍遞隱現金樓銀闕排空蒼或爲美人或鬼物或爲獅象蹲伏又或騫起同鸞皇最高之峯有如老人中立色不動兒孫羅列拱揖奔走於其傍

我從廬山來又別廬山去山靈邀我乘鐵船導我飲甘露笑我乃似彭蠡湖邊之飛雁大風起兮不能住三石梁九屏風列眞苑固安能窮巨數百里青濛濛他時興發遠相訪定蹋赤驪騎白龍回頭笑語五老峯爲我先鐫長句丹崖東

黃梅旅次偶感

我家齋頭兩樹梅春前好花如雪開花落結梅子梅子欲黃知夏來走馬尋春春不見春歸風雨淒如餓家園漸近熟梅天客身遠在黃梅縣

二郎河

二郎河畔渡征驂人似蠶眠已再三中酒阻風愁未醒落花時節到江南

聽松廬詩鈔卷二

三

楓香驛

複水重山置此身客中調護倩何人盃盤草草楓香驛明日天涯又送春

小憩潛山旅店訪二喬故居弗得悵然題壁而去

周郎霸業歎飄零杯酒誰澆墓草青萬點落紅春又老東風何處秀英亭

垂柳

垂柳萬條烟烟條盡可憐佳人在藏手春色畫樓邊三月江南路東風客裏天無端惹歸思飛絮共纏綿

早發北峽關

沈沈路黑無西東四更閉置車帷中金烏飛起曙光發千巖忽

放青芙蓉飄飄清氣天風送山影如烟壓肩重繡被奇溫襪被
寒下視人間總癡夢

護城驛

斜陽在牛角到店身如歸索湯洗垢膩客面爲光輝粗糲等精
潔中腸方苦飢解帶步墟落微風吹我衣草葢屋有髮土剝牆
無皮雞豚與兒女出入爭一扉有燈室轉黯不風塵自飛輿中
日蹉曲氣鬱筋亦疲一枕舒百骸至樂乃在斯勿謂行路難勿
歌長相思男兒不遠遊世味安得知

利國驛曉發

雞聲何處邨星光照曠野停車古渡頭烟中問漁者

南沙河

亂雲依岫濕還低細草沿溪綠未齊人到壯年輕險阻天當曉

《聽松廬詩鈔卷二》 四

色轉淒迷菰蒲烟黑千家夢楊柳風凉匹馬嘶羣動又隨初日

出車聲鞭影滿沙堤

早發滕縣

驅車天未明古道半禾黍空林吹暗風老樹作人語

淖沱河

一派淖沱水征人立馬看帝王當草昧麥飯亦艱難風捲河聲
壯天圍野色寬故鄉行更遠前路又桑乾

河間早行

馬上鄉心不易收天涯詩境總如秋孤墳月小妖狐拜破寺風
多老佛愁半夜披裘行大野幾時散髮弄扁舟軟紅塵土東華

近清夢依然戀白鷗

五月十日少寇秦小峴先生招同家船山侍御問陶鮑樹

堂侍御勳茂吳蘭雪國博嵩梁潘伯臨比部家孟平孝

廉延年集寓齋賦呈一首

記從珠水送揚舫又向京華仰德星百粵民情深望歲九重
天眷愼明刑但知報國心常赤只爲憐才眼易青把酒勞公
問桑梓海門風黑浪猶腥

贈南山

無錫秦瀛小峴

之子山陰客今爲嶺海人著書松石底屋外水鄰鄰近日京
華住青雲期致身頻年閉關久腹內有經綸

秋日恭甫師招同王伯申宮庶引之程春廬兵部同文陳

《聽松廬詩鈔卷二》 五

石士編修用光吳蘭雪國博嵩梁查梅史孝廉撰集寓

齋小飲醉後賦呈二百四十字

吾師儒林宗遠接鄭孔武盤根燦天葩鴻文邁燕許珥筆有餘
閒盡簪集儔侶入座皆賢豪忘形脫綦組芳馨襲芷蘭斑駁陳
樽俎發鮮驚白龍窺豹陋鼯鼠兵羅武庫胸樂奏鈞天示師
數雄談八埏隘逸興五嶽舉賤子生海濱茫昧習些觴長安居
不易秋心墮烟渚提壺問奇字嘉會慰羈旅大邦匹齊晉附庸
忝和菖敢云拔蚤孤頗願執干櫓海氛多蛟涎小醜尙蟻聚昨
者鄉人來近事爲覲縷契鯨爭磨牙鴻雁罹網罟亟望將帥良
先剿而後撫樓船掃鯨鯢紀律肅貔虎下以安黔黎上以報
聖主羣公雅頌材紀事編樂府詩歌騰海隅和聲協銅鼓桑梓

憂未忘芻蕘策誰取登高望故鄉愁雲并脩阻空腸得酒鳴奇鬱快一吐

呈翁覃谿先生

公昔使粵東三任歲凡八搜羅皆瑰材提倡具慧力辛卯秋九月役竣舟將發九曜結古緣韻事載詩跋公去又十秋賤子嗟晚出思公二十年緒論著舊述馮唐老爲郎臨臯比坐鄉國有時共一樽半酣語汨汨云師闢詩教務使與懶得勸之培松筠督之埽輒苗子行偕計吏晉謁會有日我師夙宏獎愛士若饑渴況子在鯉庭亦繼桃李列子如質所疑師必示以則歲月成奔蛇酸辛憶捫蝨大樹何蕭條靈光尙嶢嶢燕臺北風厲霜寺曉鐘歇樞衣來蘇齋春氣溫一室獎許鯁生詩彷彿馮子筆

聽松廬詩鈔卷一

六

聞言增忤怩感舊轉忼怛囊桐賞音慙墓草餘涕漉死生既靡常聚散亦難測往者西湖長攜我詩一帙公爲題數行節制表師律我來太守去三度易鵬蟬近得一紙書素冠返鄉邑假如亡者存復使散者集同時登公堂先後拜筮屐意公於斯時喜必動顏色公懷自浩浩小草亦噓植諄諄勉力學法古毋貌襲詩髓參微茫得失究纖悉漢魏唐宋元萬法歸一穴一本朝推漁洋著錄徵定識先生以前著小尊宿言詎忘下走說請畢少陵美多師昌黎重解惑學海千派殊靈臺衆妙集徒抽獨繭綸終遜百花蜜公示一指禪我乞諸天食願思窮垓垓未敢守阡陌秋心凌心峒歸夢跨溟渤

贈南山孝廉

大興翁方綱正三

南山舊墨綠龍石響鳴絃有鳴絃對江碧深閨鏡檢陰記泊船詩盟圓似夢易說了非禪石汝礪與坡公紹聖前題字重

枯四十年

山志陶貞白松濤李少溫鶴銘笙簫答慧麓篆煙痕淪乳來叅味青蒼許對論多生耳根業訛爾妙之門爲臨陽冰聽松篆

風抗南園後魚山又葯房何區五家派莫誤二樵狂酣放精微處深柔尺量於蘇窺杜法詩境乃升堂

子臨惠山聽松篆以贈南山而南山適以松石卷屬題因感聽松篆後題云松石相望於十步外不知幾何時合而相從此語若爲之緣者再賦二詩

松石本無意苔岑成夙期竟憑真氣合不恨淡交遲萬谷笙

聽松廬詩鈔卷一

七

鐘起千峯雨雪時琅然鸞鶴語卷外許誰知

以爾松廬境叅子石畫軒研屏相澹對濤籟卽清言雪乳香浮淺菖蒲絲結盆琅玕芝艸長息息見深根

都門秋思

崑崙中脈遠崢嶸翼翼山河拱

帝京雙闕雲盤龍虎氣九關風肅鵝鵲聲玉虹跨石飛泉淨金

爵騰空旭日明何事崢嶸談道訣

至尊宵旰念蒼生

天半清霜壓怒鵬嗟峨樓觀倚丹青白河雁去傳秋信紫禁

人歸賦早朝夢裏蓬蒿蝸舍遠眼中塵土馬蹄驕思鄉懷古愁

如海轉覺名心似落潮

百年六合一郵亭多少飛蓬與斷萍南海月華今夜白西山雲氣古時青逢人漫逞談天技望遠思緒縮地經邱壑高深隨處有世間難得少微星

刀剪能傷獨客心授衣時節怕登臨千林葉脫羣鴉舞五夜風來萬馬吟種地幾人收白壁築臺從古重黃金哀絲豪竹朱門裏秋老都成變徵音

十二月十九日坡公生日覃谿先生招同法時帆官庶

式善 宋芷灣 湘 洪介亭 占 顧南雅 三編修吳蘭雪

國博集蘇齋題李委吹笛圖

大江不動羣山高磯頭主客方酣酌笛聲飛起石欲裂何人江上浮輕舸李生意態孰想像紫裘腰笛巾飄飄壽公一曲已不

聽松廬詩鈔卷一

八

俗乞公一詩良足豪鶴飛新製似有意夜半赤壁曾相遭疇昔道士今進士無乃變幻來解嘲東坡鬚眉一可百何況羽客能翔鄒白鶴南遷早成讖春睡正美晨鐘敲阿婆姓氏亦烏有夢中說夢原超超七百年來壽無量瓊樓玉宇公逍遙蘇齋學士公弟子歲歲設祭陳芳醪烏雲天際望縹緲恍惚鶴駕乘雲輅松屏石畫有真契畫中詩境思臨臯瓣香再拜何所獻下界箚箇空嘈嘈

覃谿先生出示天際烏雲帖墨蹟屬和詩

四海知公雙鬢儲年年置酒壽東坡高齋更展烏雲帖下里難酬白雪歌淘盡英雄江水急敲殘春夢寺鐘多鬚眉笠展俱無恙玉宇瓊樓近若何

聽松廬詩鈔

素小嶼先生招同法時帆官庶吳蘭雪國博陶季壽大令

章鴻 潘伯臨比部集寓齋拜淮海先生像

盛年胸次羅六韜黃樓作賦凌楚騷峨嵋仙人信知已謫宦海南亦相似藤陰醉臥何忽忽萬緣一笑如太空功名富貴楚弓耳黨籍姓名重青史公竹酒星來處州耳孫摹像圭山頭公訪辨才過龍井孫復建祠供清茗今晨遺像懸中堂一杯兼酌晁張黃卻話秦郵艤舟處微雲澹抹山蒼蒼相逢酒畔多羈客思鄉未易身如石盤飧風味憶淮南欲剪薑芽配鮮鮓

送齊北溟編修

命冊封琉球便道歸省

皇華詩合白華詩

聽松廬詩鈔卷一

九

天使還家四海知羽舞兩階唐日月衣披一品漢威儀魚龍爭護星槎渡桑梓圍看玉節持歸向瀛洲編故事驅濤萬里入雄詞

海鶴篇呈學士王定九先生

海鶴生海濱泛泛同鷗鳬偶然逐歸鴻奮翼遊紫都道逢阿閣鳳愛此毛羽殊謂其鳴聲清詎合棲泥塗顧盼引之起昂首多享衛愧無摩天翮豈能效搏扶闔闔吹罡風茫然墮平蕪鷺采繽紛安用鶴骨瘰回頭謝鳳凰雲中遙相呼黃雀報玉環嗟哉鶴不如

贈吳蘭雪

一卷香蘇冰雪詩藏園筆已讓君持金門索米功名薄酒市論

交遊近奇花月歎場胸有淚江湖浪迹費成絲冷官莫笑腰難折憶向梅花拜倒時爾雪有滿身風雪拜梅花之句

次韻酬南山見贈卽送出都

東鄉 吳嵩梁 爾雪

放膽文章刻意詩窮愁性命共支持千秋把臂交原篤一第登天事亦奇少日才名憎似錦連宵別夢亂如絲凌雲氣在終須吐莫忘青衫掩淚時

將出都倪素之比部

孟華

金藝圃駕部漆瓏淵劉三山

東兩孝廉蘇韞石

獻琛

衍基

家椒園兩明府潘伯臨比

部俱有詩贈別奉酬二首

蘆溝垂柳故依依似向斜陽絆客衣流水無情紅雨散暖風有力綠陰肥扶搖北海看鵬徙遼瀾南天任鶴飛觸熱長途非得已高堂書到有當歸

《聽松廬詩鈔卷二

十

旅食京華已匝年又聽車鐸送吟鞭凡材敢望空羣馬歸路先愁上水船交到忘形真骨肉事當適意卽神仙萊衣未受緇塵染舞向重園亦粲然

趙北口

征輪礮礮路迢迢雨送輕寒曉未消心在愁邊身入畫一川烟柳十三橋

雄縣曉發

屋老燈無焰窗虛紙有聲四更寒雨驟五月敝裘輕地古分燕趙天陰失晦明客心流水急不敢數歸程

任平旅次題壁

疑雨疑烟馬後塵乍寒乍暖客邊身暮禽有意欲留我老樹無言多問人家遠寸心如轉轂路長雙足是勞薪荒村澀酒難成醉更聽琵琶一愴神

舊縣道中

崩沙如壤牆入谷晝昏黑我車如扁舟動蕩不少息况復雨後泥已沒草間轍馬蹄鏗有聲破碎踏危石斧削留巉巖穀擊爭寸尺去歲從南來冷霧荒荒白今年自北歸高柳垂垂碧一身嘗艱虞兩度感今昔下坡途稍夷出險心尙慄

過劉伶墓

片碣劉伶墓雙輪古道邊誰能將白酒直爲達黃泉一鋪竟長醉二豪今孰傳客來思痛飲草綠正堪眠

《聽松廬詩鈔卷二

十

黃河舟次

已憐轆轤苦垂頭又被沙鷗笑倦遊青草歲華催兩鬢黃河風雨滯孤舟夢回斷岸蘋花曙歸及空山桂樹秋海底珊瑚無恙在釣竿吾欲拂東流

同人汎舟山塘遂遊虎邱歸途遇韓夢香秀才

繁絃急管催青春蘭舟桂棹邀美人美人勸我碧螺瓊迴腸得酒如車輪披衣登岸山風送生公去後幽禽啼石裂苔留虎氣腥池荒水抱魚腸凍豪華事過轉蒼涼老佛無言塔影長眞孃歌舞吳王劍一樣徘徊問夕陽櫻桃香裏簫聲度故人訪我中途遇商量痛飲何處宜要離塚畔梁鴻墓

曉望太湖作歌